



Акафист святой блаженной Матроне Анемнясевской
Белякова, Матрёна Григорьевна (1864 - 1936), исповедница, блаженная.
Память 16 июля, в Соборе Рязанских святых и в Соборе новомучеников и исповедников Российских

Блаже́нная Матро́на Анемня́севская

Сла́ва тебе́ бже́ нашѣ, сла́ва тебе́.

Црю́ нѣный:

Тригто́е. Пресѣ́ла тѣце: О́че нашѣ: Гди́ помни́ши, бѣ. Сла́ва, и ны́нѣ:

Прѣидѣ́те, поклонѣ́мса црѣ́ви наше́мꙋ бгꙋ.

Прѣидѣ́те, поклонѣ́мса и припадѣ́мъ хрѣ́стꙋ, црѣ́ви наше́мꙋ бгꙋ.

Прѣидѣ́те, поклонѣ́мса и припадѣ́мъ само́мꙋ хрѣ́стꙋ црѣ́ви и бгꙋ наше́мꙋ.

Псаломъ дѣдꙋ, рѣв.

Гди́, оꙋслы́ши мѣтвꙋ мою́, вни́ши моле́нїе моѣ́ во и́стинѣ́ твоѣ́й, оꙋслы́ши мѣ́ въ пра́вдѣ́ твоѣ́й: И́ не вни́ди въ сꙋды́ съ ра́комъ твоѣ́мъ, ꙗ́кѡ не ѡ́правди́тса пре́дъ то́бою всѣ́хъ живы́й. ꙗ́кѡ погна́ вра́гъ дꙋшꙋ́ мою́, смири́ла ѣсть въ зе́млю живо́тъ мой: Посади́ла мѣ́ ѣсть въ те́мныхъ, ꙗ́кѡ мѣ́ртвыа вѣ́ка. И́ оꙋны́ во мнѣ́ дꙋхъ мой, во мнѣ́ сма́тѣла се́рдце моѣ́. Помани́ши дни́ дрѣ́внїа, подчи́хла во ве́сехъ дѣ́лѣхъ твоѣ́хъ, въ творе́нїихъ рꙋкꙋ́ твоѣ́ю подча́хла. Воздѣ́хъ къ тебе́́ рꙋцѣ́ мои, дꙋша́ моѣ́ ꙗ́кѡ зе́мля́ безво́днаа тебе́́. Ско́ро оꙋслы́ши мѣ́ гди́, исче́зѣ́ дꙋхъ мой: не ѡ́врати́ лица́ твоегѡ́ ѡ́ мене́, и оꙋподѡ́блюса низхо́дящымъ въ ро́вѣ. Слы́шана́ сотвори́ мнѣ́́ за́тра мѣ́твꙋ твоѣ́ю, ꙗ́кѡ на тѣ́ оꙋпова́хъ. Скажи́ мнѣ́́ гди́, пѣть, ко́ньже по́йдꙋ, ꙗ́кѡ къ тебе́́ вꙋа́хъ дꙋшꙋ́ мою́. Изми́ ма ѡ́ вра́гъ мои́хъ, гди́, къ тебе́́ прикѣ́гохъ, на́чи ма твори́ти во́лю твоѣ́ю, ꙗ́кѡ ты́ ѣси́ бгꙋ́ мой. Дꙋхъ твоѣ́й бл҃гї́й на́ставитъ мѣ́ на зе́млю пра́вꙋ. И́мене́ твоегѡ́́ ра́ди гди́, живи́ши мѣ́, пра́вдою твоѣ́ю и́зведе́ши ѡ́ печа́ли дꙋшꙋ́ мою́: И́ мѣ́твꙋ твоѣ́ю потре́бїши вра́ги моѣ́, и погꙋ́биши всѣ́ стꙋжа́ющыа дꙋшѣ́ моѣ́й, ꙗ́кѡ ѡ́зъ ра́къ твоѣ́й ѣ́сма.

Сла́ва, и ны́нѣ: ѡ́ллашїа, ѡ́ллашїа, ѡ́ллашїа, сла́ва тебе́́ бже́. Трижды́.

Тропа́рь, гла́еъ и́:

ꙗ́кѡ зарни́ца небе́снагѡ́́ о́гна въ разанѣ́тей стрази́ блажѣ́ннаа стари́ца свѣта́а Матро́на, / ѣ́же па́мать днѣ́сь твора́ще, воспо́имъ Христа́ Бг҃а, / мола́ще бг҃ѡ́ дарова́ти намъ́ то́а предста́тельствѡмъ́ въ боле́зняхъ, бедѣ́хъ и ско́рбехъ́ терпе́нїе, // и дꙋша́мъ́ нашимъ́ ве́лю мѣ́лостъ.

Вонда́къ, гла́еъ и́:

Въ немо́щехъ́ сїа́ꙋ, въ слѣ́потѣ́ о́чи нетла́енныа ѡ́връблѣ́ ѣ́си, / пре́кыва́ющїи на о́дрѣ́ боле́зни, / ве́одꙋ́ ꙗ́кѡ птѣ́ца дꙋхомъ́ носїла́са ѣ́си, младе́нствꙋ́ющїи тѣ́ломъ, / была́ ѣ́си ма́ти ско́рѣ́щимъ́ и ѡ́брꙋ́вѣ́емымъ. / Тѣ́мже чтꙋ́щихъ твоѣ́ю па́мать не ѡ́ста́ви въ моли́твахъ, // и помо́ги намъ́́ избе́вїтса ѡ́ грѣ́хѡ́въ пока́нїемъ, и оꙋлꙋ́чїти́ съ то́бою́ Ца́рство́ Небе́сноѡ́.

Кондак 1

Избранную угодницу Христову, в земли рязанстей просиявшую, / и преизрядную молитвенницу о душах наших песньми восхвалим, блаженную Матрону: / ты бо в терпении мнозе житие твое претекла еси, и страданием украсившись, угодна Богу явллася еси. / Темже убо стяжавши дерзновение ко Господу, / Того моли избавити ны от всякаго зла, с любовию чтущих память твою и поющих ти:// Радуйся, Матроно, в скорбех и напастех нам помогающая.

Икос 1

Ангельски поживши, блаженная Матроно, телесе страданием душу твою убелила еси и небесныя радости причастница быти сподобилася еси. И ныне, пребывающи во Царствии Небеснем вкупе с лики ангел и всех святых, непрестанно молишися за ны, со умилением поющих ти таковая:

Радуйся, земли рязанския похвало;

радуйся, страны российския молитвеннице новая.

Радуйся, Богу житием твоим угодувшая;

радуйся, терпением мнозем душу убелившая.

Радуйся, страданием украшенная;

радуйся, венцем славы от Бога увенчанная.

Радуйся, с дерзновением ко Господу молящаяся;

радуйся, на земли прославляемая.

Радуйся, яко ныне пред Царем царей предстоиши;

радуйся, яко чтущих тя пред Богом поминаеши.

Радуйся, со всеми святыми на Небеси пребывающая;

радуйся, о прославляющих тя Бога молящая.

Радуйся, Матроно, / в скорбех и напастех нам помогающая.

Кондак 2

Видяще, яко болезнию издетска избра ты Господь, Того бо сила в немощи совершается, радуемся таковому о тебе Божию смотрению, вопиюще Ему: Аллилуиа.

Икос 2

Разумеючи Божие изволение, от юности Господу вручила еси себе, и взявши свой крест болезней телесных, яко от руку Самаго Христа, чрез все житие твое невозвратно Тому последовала еси. Мы же Господа, избравшаго ты, прославляюще, радостно вопием ти:

Радуйся, Богом избранная;

радуйся, Христу уневещенная.

Радуйся, сердце твое Господеви отдавшая;

радуйся, крест твой безропотно понесшая.

Радуйся, издетска на Господа уповавшая;

радуйся, устнами чистыми Богови молившаяся.

Радуйся, отроковице, от Бога услышанная;

радуйся, в терпении твоём свыше укрепленная.

Радуйся, Духа Святаго сосуде очищенный;

радуйся, яко о тебе сила Божия является.

Радуйся, в немощи лежащая немощным помощнице;

радуйся, Божия благодати цельбоносный источнице.

Радуйся, Матроно,/ в скорбех и напастех нам помогающая.

Кондак 3

Бурю укоризн и поруганий от родителю твоею непрестанно с младенчества претерпеваючи, на Бога единого уповала еси, веро-вавши словесем Его: яко аще же и мать забудет дитя свое, но Аз не забуду тебе, с надеждою вопияла еси Тому: **А**ллилуиа.

Икос 3

Имущи от седми лет очи слепе, слезы многи пролила еси, от матере биения терпящи, и се, явися ти Сама Пречистая, егда же матери сие рекла еси, та паки всеу зле бияше тя, обаче трици Богородица являшеся, оставивши тебе рукописание утешительное. Тебе же отголе в расслаблении лежащей и не озлобленной, со слезами приносим таковая:

Радуйся, беды от сродник терпевшая;

радуйся, в молчании скорби понесшая.

Радуйся, издетска возлюбившая Бога яко Отца;

радуйся, уповавшая в напастех на Того единаго.

Радуйся, многослезныя молитвы к Богу пролившая;

радуйся, многи скорби от матере твоея претерпевшая.

Радуйся, отроковице, от Матере Божия возлюбленная;

радуйся, под покровом милости Ея утешенная.

Радуйся, показавшая образ кротости и незлобия;

радуйся, поревновавшая смирению Христову.

Радуйся, яко в тебе вера и любы являются;

радуйся, яко житие твое по Бозе прославляется.

Радуйся, Матроно,/ в скорбех и напастех нам помогающая.

Кондак 4

Сила Божия укрепляше тя, егда в болезни страдальчествующи, яко злато в горниле огненнем, душу твою очистила еси, и в горний Иерусалим устремилася еси, ум и сердце отрешивши от всего земнаго и привременнаго, и на всяком месте, идеже превитала еси, пояше песнь Богу: Аллилуиа.

Икос 4

Видев некий человек тя к одру болезни пригвожденную и разумея в простоте сердца своего, яко Богу угодна еси, прииде к тебе в немощи своей, дабы от рук твоих получить исцеление. Мы же, видяще совершение просимаго, Бога прославляюще похвальная приносим ти:

Радуйся, волю свою воли Божией покорившая;

радуйся, яко Иов вся от Бога благодарне приимшая.

Радуйся, язвы и раны на теле твоём носившая;

радуйся, в жертву Богу всю себе принесшая.

Радуйся, силою Божиею в болезни укрепленная;

радуйся, душею, яко в горниле очищенная.

Радуйся, отрешившая ум и сердце от всего земнаго;

радуйся, помышлявшая токмо о небеснем.

Радуйся, в горний Иерусалим устремившаяся;

радуйся, сподобльшаяся сладости райския.

Радуйся, от Господа дар исцеления приимшая;

радуйся, прикосновением руку твою исцелявшая.

Радуйся, Матроно,/ в скорбех и напастех нам помогающая.

Кондак 5

Звезда многосветлая явилася еси, предивная мати Матроно, яко светильник неугасаяй, путеводящи человеков по морю житейскому, людския страсти в душе кротости обличала еси и подавала еси всем исцеления не токмо телесная, но и душевная, увещаваючи церковь Божию посещати и за вся Бога славити, с любовию поюще Ему: **А**ллилуиа.

Икос 5

Слышавше людие ближнии и дальнии о чудесех тобою творимых, притекаху к тебе, яко к купели силоамстей, в болезнех и скорбех, бедах и нуждах, и никтоже от тебе без утешения отиде. Ты же, мати Матроно, помогаючи всем, назидала еси наипаче Бога благодарити. И мы, прославляюще твое смирение, поем ти таковая:

Радуйся, Божественнаго Духа чистое селение;

радуйся, к Богу стяжавшая велие дерзновение.

Радуйся, по морю житейскому путеводящая;

радуйся, болезни телесныя и душевныя исцеляющая.

Радуйся, сущих во страстех с кротостию обличавшая;

радуйся, путь смирения во спасение нам указавшая.

Радуйся, врачьми оставленных дивное исцеление;

радуйся, в пианстве гибнущих скорое исправление.

Радуйся, яко обидимых от злых заступаеши;

радуйся, яко погибающих в бедствиих спасаеши.

Радуйся, сродник враждующих благое примирение;

радуйся, с верою прибегающим к тебе присное утешение.

Радуйся, Матроно,/ в скорбех и напастех нам помогающая.

Кондак 6

Дивно и странно есть слышати, мати Матроно, како не имуши научения книжного, людем приходящим поучения от Священного Писания глаголала еси. Наставляющи пребывати их в заповедех Господних, жития святых во образ им полагала еси, подвизающи всех звати Богу: Аллилуиа.

Икос 6

Возлюбивши обитель Дивеевскую, зело почитала еси блаженную Марию, тамо пребывающую, и с нею сущи во общении духовнем, молитву вкупе творила еси. И тако многия недужныя и страждущыя от дух нечистых вашими молитвами исцеляюще, на путь покаяния наставляли есте. Мы же Бога, дивнаго во святых своих, восхваляюще, приносим ти таковая:

Радуйся, измлада благодати Божия исполненная;

радуйся, дары Духа Святаго обогащенная.

Радуйся, премудрость и разум от Бога приявшая;

радуйся, твоими ученьми во спасение назидавшая.

Радуйся, от Бога свыше наученная;

радуйся, паче книжных просвещенная.

Радуйся, подававшая совет благий во исправление;

радуйся, направлявшая от вечныя погибели ко спасению.

Радуйся, пребывавшая с блаженною Мариєю в духовнем общении:

радуйся, посылавшая бесных многих к ней за исцелением.

Радуйся, на земли сподоблшаяся слышати пение небесное;

радуйся, яко ныне на небесех Господу воспеваеши со ангелы.

Радуйся, Матроно,/ в скорбех и напастех нам помогающая.

Кондак 7

Иноческий чин превыше всего земнаго поставлявшая, сердцем своим скорбела еси яко не возможно есть тебе во святей обители пребывати. Мы же Господу, давшему ти поприще иное прейти, сиречь в мирстем чине людем послужити, благодарственно воспоим: Аллилуиа.

Икос 7

Имущи огонь любве ко Господу в сердце своем, подвигу преподобных отцев поревновала еси блаженная, непрестанно умерщвляючи плоть свою хладом, бдением и пощением. Мы же, немощнии, ублажающе тя, зовем тебе сице:

Радуйся, от юности возлюбившая нищету духовную;

радуйся, дух твой окрилившая тайною молитвою.

Радуйся, благое иго Христово на ся вземшая;

радуйся, бремя Его с радостью понесшая.

Радуйся, любовь Божию возжженная свеще;

радуйся, преподобных отцев подражательница.

Радуйся, мраз со благодушием претерпевавшая;

радуйся, постом твоим дух немощных укреплявшая.

Радуйся, лучами Святаго Духа озаренная;

радуйся, преисполненная милости к ближним и сострадания.

Радуйся, бедствующим на помощь ускоряющая;

радуйся, в радость претворяющая печаль скорбящих.

Радуйся, Матроно,/ в скорбех и напастех нам помогающая.

Кондак 8

Новое и лютое гонение на Церковь Божию власть предержавшии воздвигоша, дышаще прещением и убийством. Ты же, Матроно, в правой вере всех укрепляющи, увещавала еси вся претерпети и веру хранити, со упованием взывающе к Богу: Аллилуиа.

Икос 8

Хотяща списати житие твое, блаженная Матроно, приидоста к тебе два верных мужа, ты же ничесоже о себе глаголаша еси, обаче узревши духовными очима, яко от Господа мученический венец обема уготован есть, молилася еси, просящи има у Господа терпения и помощи, во еже крест понести. Сего ради, тайнозрению твоему дивящися, приносим ти таковая:

Радуйся, Бога паче всего земнаго возлюбившая;

радуйся, себе ни во чтоже вменившая.

Радуйся, паче жизни возжелавшая Царствия Небеснаго;

радуйся, на мученичество укреплявшая верных.

Радуйся, молитвеннице о сущих в гонениих;

радуйся, научающая за Христа терпети страдания.

Радуйся, прозревшая уготованныя верным венцы;

радуйся, яко о святости твоей свидетельствоваша мученицы.

Радуйся, наставлявшая благодарне крест Богом данный нести;

радуйся, увещававшая всегда ко Господу прибегати.

Радуйся, како в страданиях веру хранити показавшая;

радуйся, яко немощныя в скорбех укрепляеши.

Радуйся, Матроно,/ в скорбех и напастех нам помогающая.

Кондак 9

Внегда соблазны мнози Церковь Русскую обуреваху, ты, Матроно, ревнительница сущи веры православныя, чада Божия в смятении пребывающая увещавала еси душепагубных расколов уклонятися, да чистым сердцем всегда взывают Богу победную песнь: Аллилуиа.

Икос 9

Все житие твое, достоблаженная мати Матроно, преисполненно проповедания веры, надежды и любви, яже к Богу и ближним. Ты бо страждущи по воли Божией, яко верну Зиждителю, душу твою предала еси во благотворение. Сего ради прими от нас приносимое ти ныне песнопение:

Радуйся, верное чадо Церкви Православныя;

радуйся, в броню веры и любви оболкшаяся.

Радуйся, непреложне за Господем последовавшая;

радуйся, чистоту веры сохранившая.

Радуйся, смятенных наставлявшая в Православии;

радуйся, обличавшая отпавших от Церкве.

Радуйся, хранящая от пагубных расколов чада Божия;

радуйся, скорбящая об уклонившихся веры правыя.

Радуйся, безприкладный источниче веры, надежды и любви;

радуйся, истины немолчное проповедание.

Радуйся, немощныя в вере заступяющая;

радуйся, малодушныя с любовию утешяющая:

Радуйся, Матроно,/ в скорбех и напастех нам помогяющая.

Кондак 10

Не может град укрытися верху горы стоя, тако и ты, богомудрая Матроно, яко свеща на свещнице светом любви своея вся осиявала еси, да видящий добрая дела твоя прославляют Бога Отца, иже на Небесех, воспевающе Ему: Аллилуиа.

Икос 10

Людие неразумнии, грехом уязвленнии и не хотящии к Богу обратиться, да исцелит их, возскрежеташа на тя, блаженная Матроно, и злосоветие сотворивше, изгнаша тя из веси своея. Человек же тяжкосердый, иже изнесе тя, в наказание злострадая, каюся, издше, зане Бог поругаем не бывает. Мы же, видяще вся бывшая, в страхе Божиим взываем ти:

Радуйся, милосердию Христову подражавшая;

радуйся, безмездно цельбы людем подававшая.

Радуйся, граде, верху горы стояй;

радуйся, свете любви Божия, всех осиявая.

Радуйся, за имя Христово хулимая;

радуйся, гонимая за веру Божию.

Радуйся, людем в нуждах благотворившая;

радуйся, злая возблагая приимшая.

Радуйся, правды ради изгнанная;

радуйся, о изгоняющих тя молившаяся.

Радуйся и веселися, на подвиг Богом благословенная;

радуйся, яко мзда твоя многа на Небесех.

Радуйся, Матроно, / в скорбех и напастех нам помогающая.

Кондак 11

Не устрашилася еси, угоднице Божия, уз темничных, ибо радостию почитала еси за Христа страдания прияти, темже убо в тяжких недузех пребываючи, немощию своею сильных мира сего посрамила еси. Сего ради велегласно воспойм Богу победившему мир: Аллилуиа.

Икос 11

Аще и не до смерти пострадала еси, блаженная Матроно, но исповедничеством веры украсившись, венец славы от Бога прияла еси. Ныне же с ликом новомучеников и исповедников российских соувенчанно пребываеши и за чада Божия тепле предстательствуеши. Мы же, крепостию духа твоего утверждаемии, воспеваем ти таковая:

Радуйся, уз темничных не устрашившаяся;

радуйся, страstem Христовым приобщившаяся.

Радуйся, радостию почитавшая гонения за веру;

радуйся, посрамившая сильных мира немощию своею.

Радуйся, приимшая заточение Царствия ради Божия;

радуйся, яко тамо слово Господне не преставаше проповедати.

Радуйся, в скорбех лютех не унывавшая;

радуйся, искушения мужески терпевшая.

Радуйся, исповеданием веры украшенная;

радуйся, с мученики соувенчанная.

Радуйся, не убоявшаяся от убивающих тело;

радуйся, ныне за скорби зело утешенная.

Радуйся, Матроно,/ в скорбех и напастех нам помогающая.

Кондак 12

Уготовляючися в мир иной отити, рекла еси знаемой своей, яко Мардария ныне наречена еси, лишше же ничесоже глаголющи, но вся устремилася еси горе, от всего житейского отрешившися, и токмо к Богу ум свой возводящи, яко к надежде непреложней, с упованием на милость его вопияла еси Ему: **Аллилуиа.**

Икос 12

Поюще по Бозе подвижническое твое житие, достохвальная мати Матроно, не вемы, где погребена еси, но истинно вемы, яко блаженного упокоения в Бозе сподобльшаяся, в Царстве Его пребывавши и всем призывающим тя помощь скорую подаеши. Мы же Бога, прославльшаго тя, благодаряще, пение сердечное приносим ти:

Радуйся, вознесшаяся умом своим ко **Г**осподу;

радуйся, в немощи стяжавшая высоту духовную.

Радуйся, за весь мир с усердием моляящаяся;

радуйся, ластовице благоглаоливая.

Радуйся, яко не скрыла еси талант Богом данный;

радуйся, обретшая бисер многоценный.

Радуйся, веры зерно горушично в себе возрастившая;

радуйся, пшенице, мног плод принесшая.

Радуйся, мудрая дево, еяже светильник не угасает;

радуйся, яко имя твое написася в книзе жизни.

Радуйся, яко на всяк день оболчена бе в одеяние брачное;

радуйся, на пир к Небесному Жениху избранная.

Радуйся, Матроно,/ в скорбех и напастех нам помогающая.

Кондак 13

О святая блаженная мати Матроно, зряще твое скорбное житие, со умилением сердечным молим тя: приими ныне от нас, немощных, малое сие моление, с любовью тебе приносимое, огради ны молитвами твоими от всякия скорби, беды и нужды, да предстательством твоим избавимся вечныя муки, да сподобит и нас Господь купно с тобою и всеми святыми во веки в Вышних пети Ему песнь трегубую: Аллилуиа.

(Этот кондак читается трижды, затем икос 1 и кондак 1)

Молитва Блаженной Старице Матроне

О преславная и достоблаженная мати Матроно, житие твое скорби исполнено бе, но взирающе на смирение твое молим тя, угоднице Божия, умоли всещедрого Бога, да низпослет нам, недостойным, милость Свою, паче же утвердит и укрепит ны в несении креста нашего, да отвержемся себе и пойдём по пути спасения за Христом, смиривше выя своя под крепкую руку Божию, принимающе вся, яже от руки Его: вемы, яко Господь един может и падших возставити, и заблуждших возвратити, и соблазвившихся исправить, и грешников праведники соделати. Огради нас, мати Матроно, молитвами твоими от сети лукаваго, да не прельщеннии им возвратимся вспять. Еще молим тя, яко имущую велие дерзновение ко Господу, пролей теплую молитву за ны, недужныя и унылыя, и испроси у Господа коемуждо благопотребная, да подаст Господь и нам, якоже тебе, терпение и благодушие в бедах и скорбных обстояниих, да проживем по воли Его во вся дни живота нашего, зане воистинну вемы, яко весть Отец наш Небесный, ихже требуем, прежде прошения нашего. О, блаженная мати Матроно, многоименитому сонму новомучеников российских причтенная, с ними моли Господа нашего и Спаса Иисуса Христа, да сохранит Церковь Православную от соблазнов, ересей и расколов, да оградит Господь страну нашу от всех наветов видимых и невидимых враг и изимет ю из пучины безбожия: вемы, яко живем ныне токмо ради крове мучеников излиянныя, дарует же и нам Господь ничесоже бояться, верным же быти Ему даже до смерти, и яко мучениколюбцем со мученики возрадоватися во Царствии Небеснем. Ей, мати Матроно, испроси нам у Человеколюбца Господа время покаяния, да не исторгнет ны аки плевелы прежде жатвы, да не во зле погибнем, но да очистит ны от всякия скверны плоти и духа, во еже явитися нам в день судный нескверным и непорочным пред лицом Его, да чистым сердцем, яко истинная чада Божия, радостне воззовем к Нему: не отрини ны Господи, и приими во Царствие Твое, идеже Ты царствуеши со Отцем и Святым Духом во веки веков. Аминь.

Акафист святой блаженной Матроне Анемнясевской

память: 16 июля

Молитва вторая, о даровании чад

О блаженная мати Матроно, к твоему предстательству прибегаем и тебе слезно молим, яко имущую велие дерзновение ко Господу, пролей теплую молитву о рабех твоих, в скорби душевной пребывающих и помощи от тебе просящих. Истинно бо слово Господне: просите и дастся вам, и паки: яко аще два от вас совещаета на земли о всякой вещи, еяже аще просита, будет има от Отца Моего, иже на Небесех. Услыши убо воздыхания наша и донеси я ко Престолу Владычню, идеже ты предстоиши, вемы, яко много может пред Богом молитва праведника. Да не до конца забудет нас Господь, но призрит с высоты Небесныя на скорь рабов Своих и плод чрева на полезное дарует. Воистинну, Бог идеже хочет побеждается естества чин, творит бо елика хочет: яко сотвори Господь Аврааму и Сарре, Захарии и Елисавете, Иоакиму и Анне, с нимиже моли, тако да сотворит Господь Бог и нам по милости Своей и неизреченному человеколюбию. Буди Имя Господне благословенно от ныне и до века. Аминь.